

REGIONAL NEWS UNIT
ALL INDIA RADIO, AGARTALA

Date: 21-05-2018

Time: 07:55-08:05 PM Hrs

BENGALI EVENING BULLETIN

Headlines:

- (১) ত্রিপুরা মধ্যশিক্ষা পর্ষদ পরিচালিত উচ্চমাধ্যমিক পরীক্ষার বিজ্ঞান বিভাগের ফলাফল আগামীকাল প্রকাশিত হবে।
- (২) রাজ্যের বিভিন্ন মহকুমায় বন্যা পরিস্থিতির উন্নতি হয়েছে।
- (৩) আগরতলা ও ব্যাঙ্গালোর ক্যান্টনমেন্টের মধ্যে দ্বিতীয় হামসফর এক্সপ্রেসের সূচনা হবে আগামীকাল।
- (৪) প্রধানমন্ত্রী নরেন্দ্র মোদি ও রাশিয়ার রাষ্ট্রপতি ব্লাদিমির পুতিনের মধ্যে আজ আলোচনা চলছে।

ফল প্রকাশ :

ত্রিপুরা মধ্যশিক্ষা পর্ষদ পরিচালিত উচ্চমাধ্যমিক পরীক্ষার বিজ্ঞান বিভাগের ফলাফল আগামীকাল প্রকাশিত হবে। আগামীকাল সকাল ৯ টায় পর্ষদের কনফারেন্স হলে সাংবাদিক সম্মেলনের মাধ্যমে এ বছরের ফলাফল ঘোষণা করা হবে।

ফলাফল WWW.tbse.in সহ অন্যান্য ১২টি ওয়েবসাইতে দেখা যাবে।

এছাড়া, উচ্চমাধ্যমিক বিজ্ঞান বিভাগের ফলাফল জানতে মোবাইল ফোন থেকে TBSE12 TYPE করে Space দিয়ে Roll No. type করে ৫৪২৪২ এই নম্বরে পাঠাতে হবে। ত্রিপুরা মধ্যশিক্ষা পর্ষদের সচিব এক বিজ্ঞপ্তিতে এই সংবাদ জানিয়েছেন।

বন্যা :

রাজ্যের বিভিন্ন মহকুমায় বন্যা পরিস্থিতির উন্নতি হয়েছে। বহু পরিবার বাড়িঘরে ফিরে গেছে। তবে এখনো ৭১টি গ্রাণ শিবিরে ৪ হাজার ৫৫৯টি পরিবার রয়ে গেছে। সদর মহকুমায় ৩৭টি, মোহনপুর মহকুমায় ২১টি, জিরানিয়া ও অমরপুর মহকুমায় ৪টি করে গ্রাণ শিবির খোলা রয়েছে। তাছাড়া কমলপুর, তেলিয়ামুড়া, সিপাহীজলা জেলায় ১টি করে ও খোয়াই মহকুমায় দুটি গ্রাণ শিবির খোলা রয়েছে। চলতি মাসের প্রবল বর্ষণ ও ধসে এপর্যন্ত ৯০৫টি ঘর সম্পূর্ণ ক্ষতিগ্রস্ত ও ৩ হাজার ১১টি ঘর আংশিক ক্ষতিগ্রস্ত হয়েছে। সরকারী সূত্রে আজ এসংবাদ জানা গেছে।

জল-ক্যাম্প :

আগরতলায় বর্তমানে ১২টি গ্রাণ শিবির রয়েছে। এই শিবিরগুলিতে ১৩০০ পরিবার রয়েছে। আজ বিকাল থেকে বাড়িঘর থেকে জল সরতে শুরু করেছে। তবে এম জি বাজার, প্রতাপগড় কলোনী, রামঠাকুর আশ্রম, নবীনপল্লী স্কুল, কলেজটিলা, গান্ধী স্কুল, আড়ালিয়ার ঋষি পাড়া, এম বি বি কলেজ, শ্যামসুন্দর পাড়া মন্দির, অক্ষয় পাড়া অঙ্গনওয়াড়ি কেন্দ্র

ইত্যাদিতে এখনো জল রয়েছে। প্রশাসনের পক্ষ থেকে ত্রাণ শিবিরগুলিতে খাবার সরবরাহ করা হয়েছে।

হামসফর :

আগরতলা ও ব্যাঙ্গালোর ক্যান্টনমেন্টের মধ্যে দ্বিতীয় হামসফর এক্সপ্রেসের সূচনা হবে আগামীকাল। আগামীকাল সকাল ১১টায় আগরতলা রেল স্টেশন থেকে রেল প্রতিমন্ত্রী রাজেন গোহাই ও মুখ্যমন্ত্রী বিপ্লব কুমার দেব এই ট্রেন যাত্রার সূচনা করবেন। এরফলে এখন থেকে সপ্তাহে একদিনের বদলে দুইদিন হামসফর এক্সপ্রেস চলবে।

মুখ্যমন্ত্রী :

মাতা ত্রিপুরা সুন্দরী মন্দির এলাকার সার্বিক উন্নয়নে শ্রীশ্রী মাতা ত্রিপুরা সুন্দরী ট্রাস্টের প্রথম বৈঠক আজ অনুষ্ঠিত হয়। মুখ্যমন্ত্রীর পৌরহিত্যে এই বৈঠকে মুখ্যমন্ত্রী ছাড়া পর্যটন মন্ত্রী প্রনজিৎ সিংহরায়, ট্রাস্টের সদস্য তথা বিধায়ক বিপ্লব কুমার ঘোষ, পর্যটন নিগমের প্রধান সচিব, মন্দিরের পুরোহিত চন্দন চক্রবর্তী সহ বিভিন্ন দপ্তরের আধিকারিক সহ গোমতী জেলা শাসক তরুণ কুমার দেবনাথ গোমতী জেলার এস পি, রাজ্যের মুখ্য সচিব প্রমুখ উপস্থিত ছিলেন। ত্রিপুরা সুন্দরী মন্দির এলাকার পরিধি বৃদ্ধি করা, গাড়ি পার্কিং ব্যবস্থা করা, পানীয়জল, শৌচালয় ও কল্যাণ দীর্ঘির উন্নতিতে আজ বৈঠকে বিস্তারিত আলোচনা হয়।

সমাবর্তন :

ত্রিপুরা কেন্দ্রীয় বিশ্ববিদ্যালয়ের সমাবর্তন আগামী ২৩শে মে অনুষ্ঠিত হবে। অনুষ্ঠানে প্রধান অতিথি হিসাবে উপস্থিত থাকবেন উপরাষ্ট্রপতি এম. ভেঙ্কাইয়া নাইডু। এছাড়া উপস্থিত থাকবেন রাজ্যপাল তথাগত রায়। অনুষ্ঠানে উপস্থিত থাকার জন্য মুখ্যমন্ত্রী বিপ্লব কুমার দেবকে আমন্ত্রণ জানানো হয়েছে। আজ আগরতলা প্রেসক্লাবে এক সাংবাদিক সম্মেলনে ত্রিপুরা কেন্দ্রীয় বিশ্ববিদ্যালয়ের উপাচার্য অঞ্জন কুমার ঘোষ জানিয়েছেন, ২০১৩ সাল থেকে ২০১৭ সাল পর্যন্ত সব ডিগ্রী প্রাপকদের সার্টিফিকেট প্রদান করা হবে। এছাড়া কৃতিদের মেডেল দেওয়া হবে বলে তিনি জানিয়েছেন। সাংবাদিক সম্মেলনে বিশ্ববিদ্যালয়ের রেজিস্ট্রার শানিত দেবরায়ও বক্তব্য রাখেন।

সিপিআই(এম) :

সিপিআই(এম) রাজ্য সম্পাদক মন্ডলীর পক্ষ থেকে রাজ্যের বিভিন্ন স্থানে অগনতান্ত্রিকভাবে দলীয় অফিস ভেঙ্গে দেয়ার অভিযোগ করা হয়েছে। এছাড়াও কিছু কিছু স্থানে পুরপরিষদের কর্মী, শিক্ষক ও দলীয় কর্মীদের বাড়িঘরে হামলারও অভিযোগ করা হয়েছে। সম্পাদক মন্ডলীর বিবৃতিতে এইসব ঘটনার তীব্র প্রতিবাদ জানানো হয়েছে।

নিখোঁজ :

গোমতী জেলার অম্পিতে ছনগান নদীতে আজ মাছ ধরতে গিয়ে নিখোঁজ হয় এক যুবক। যুবকের নাম চিন্ময় রুদ্র পাল। ঘটনা ঘটে সাড়ে ১২টা নাগাদ। সন্ধ্যা পর্যন্ত তাকে উদ্ধার করা সম্ভব হয়নি।

দুর্ঘটনা :

বোধজংনগর শিল্প নগরীতে আজ সকালে এক পথ দুর্ঘটনায় ৮ জন আহত হয়েছেন। আহতদের জি বি হাসপাতালে ভর্তি করা হয়েছে। পুলিশ সূত্রে জানা যায় এখানকার কোম্পানীর একটি বোলেরো গাড়ি কর্মীদের নিয়ে কারখানায় যাওয়ার সময় উল্টে যায়। এতে ৮ জন কর্মী আহত হয়।

প্রধানমন্ত্রী :

প্রধানমন্ত্রী নরেন্দ্র মোদি ও রাশিয়ার রাষ্ট্রপতি ব্লাদিমির পুতিনের মধ্যে আজ আলোচনা চলছে। আজই শ্রী মোদি এই ঘরোয়া আলোচনার উদ্দেশ্যে সোচিতে গিয়ে পৌঁছান। আলোচনা শুরু হওয়ার আগে সোচিতে বোচেরে ফ্রিকে শ্রী পুতিন শ্রী মোদিকে উষ্ণ অভ্যর্থনা জানান হয়। বিদেশ মন্ত্রকের মুখপাত্র রবীশ কুমার এই খবর জানিয়ে বলেন, গভীর বিশ্বাস, পারস্পরিক সম্মান ও সদ্ভাবনার উপরই ভারত ও রাশিয়ার সম্পর্ক গড়ে উঠেছে। উভয় নেতার মধ্যে পারস্পরিক স্বার্থ সংশ্লিষ্ট বহুপাক্ষিক ও দ্বি-পাক্ষিক বিষয়ে আলোচনা হবার কথা।

শ্রী মোদি আজ সোচি শহরের বিভিন্ন স্থানও পরিদর্শনের কথা রয়েছে।

রাষ্ট্রপতি :

রাষ্ট্রপতি রামনাথ কোবিন্দ ছাত্রদের স্বরোজগারি হবার আহ্বান জানান। তিনি আজ হিমাচল প্রদেশের সোলান জেলার নাওনিতে ড: ওয়াই. এস.

পরমার বাগিচা ও বন সংরক্ষণ বিশ্ববিদ্যালয়ের নবম সমাবর্তনে প্রধান অতিথি হিসেবে ভাষণ দিচ্ছিলেন। আকাশবাণীর সংবাদদাতা জানাচ্ছেন, এই অনুষ্ঠানে রাষ্ট্রপতি বাগিচা ও বন সংরক্ষণ ক্ষেত্রে বিশেষ অবদানের জন্য ৯ জন ছাত্রকে স্বর্ণ পদক প্রদান করেন। উল্লেখ্য, রাষ্ট্রপতি ৬ দিনের সিমলা সফরে রয়েছেন।

নাইডু :

উপরাষ্ট্রপতি এম. ভেঙ্কাইয়া নাইডু মানুষের মন থেকে অস্পৃশ্যতা দূর করার আহ্বান জানিয়েছেন। তিনি বলেছেন, মহান চিন্তাশীল ও দার্শনিক শঙ্করাচার্য্য এই অমানবিক বিষয়ের বিপক্ষে ছিলেন। শ্রী নাইডু আজ কেরালাতে আদি শঙ্করাচার্য্য বিজ্ঞান ও প্রযুক্তি প্রতিষ্ঠানে তরুণ বিজ্ঞানীদের পুরস্কার প্রদান অনুষ্ঠানে একথা বলেন। তিনি তরুণ ছাত্রছাত্রীদের মাতৃভূমি ও মাতৃভাষাকে সম্মান করার কথা বলেন। তিনি বলেন, যুব সমাজের মধ্যে যদি জ্ঞান, দক্ষতা ও মানসিকতার সঠিক সমন্বয় ঘটে তবে দেশের বৃদ্ধি ও উন্নয়নের ক্ষেত্রে তা সুফলদায়ী হবে।

প্রধানমন্ত্রী-কটক :

প্রধানমন্ত্রী নরেন্দ্র মোদি আগামী ২৬শে মে ওড়িশার ঐতিহাসিক শহর কটক সফরে যাবেন। ঐদিন কেন্দ্র NDA সরকারের শাসনের ৪ বছর পূর্ণ হবে। এই উপলক্ষ্যে প্রধানমন্ত্রী মহানদীর তীরে প্রসিদ্ধ বালী যাত্রা ময়দানে এক জনসভায় ভাষণ দেবেন। এটি শ্রী মোদির প্রথম কটক সফর হবে।

মন-কি-বাত :

প্রধানমন্ত্রী নরেন্দ্র মোদী এ মাসের ২৭ তারিখ, রবিবার সকাল ১১টায় আকাশবাণীর 'মন-কি-বাত' অনুষ্ঠানে দেশ-বিদেশের জনগনের সঙ্গে মত-বিনিময় করবেন। এটি মন-কি-বাতের ৪৪তম পর্ব। এক টুইট বার্তায় প্রধানমন্ত্রী জনগণকে তাদের পরামর্শ নরেন্দ্র মোদী এপে পাঠাতে বলেছেন। জনগণ তাদের মতামত ও পরামর্শ my gov open forum-এ অথবা Toll-ফ্রি নম্বর 1800-11-7800 এই নম্বরে হিন্দী ও ইংরেজীতে রেকর্ড করাতে পারবেন। এছাড়াও 1922 এই নম্বরে মিস-কল দিয়ে যে লিঙ্ক পাওয়া যাবে, তাতে সরাসরি প্রধানমন্ত্রীকে নিজের পরামর্শ পাঠানো যাবে। আকাশবাণী ও দূরদর্শনের সমস্ত চ্যানেল এই অনুষ্ঠান প্রচার করবে। এছাড়াও প্রধানমন্ত্রীর দপ্তর, তথ্য সংস্কৃতি মন্ত্রক এবং DD News-এর ইউ-টিউব চ্যানেলে তা শোনা যাবে। অনুষ্ঠানটির হিন্দী সম্প্রচারের পরপরই তার আঞ্চলিক ভাষার অনুবাদ শোনা যাবে। আঞ্চলিক ভাষার অনুষ্ঠানটি রাত আটটায় পুনঃপ্রচারিত হবে।

জাদু কলিজা :

উপজাতিদের লুপ্ত প্রায় কৃষ্টি সংস্কৃতিকে পুনরুজ্জীবিত করতে এডিসি প্রশাসন বলিষ্ঠ পদক্ষেপ গ্রহণ করেছে। এর অঙ্গ হিসেবে গত বছর থেকে ককবরক ভাষীদের জন্ম থেকে মৃত্যু অবধি বিভিন্ন উৎসবের সাথে জড়িত জাদুনির (লোকগাথা)র গানের কথাগুলো সংগ্রহ করার কাজ শুরু করা হয়েছিল। এই উদ্দেশ্যে রাজ্যের বিভিন্ন স্থানে এডিসি'র তথ্য ও সংস্কৃতি ও পর্যটন দপ্তরের উদ্যোগে কর্মশালা সংগঠিত করা হয়। গতকাল এই কাজ সম্পন্ন হয়েছে বলে জানান এডিসির তথ্য ও সংস্কৃতি ও পর্যটন দপ্তরের বরিষ্ঠ

সংস্কৃতি আধিকারিক রুহি চন্দ্র দেববর্মা। আগামী কিছু দিনের মধ্যেই সংগ্রহ করা জাদু কলিজাগুলো সংকলন করে বই প্রকাশ করার উদ্যোগ নেওয়া হবে। এর ফলে একদিকে ককবরক ভাষা বিকশিত হবে। অন্যদিকে ককবরক গান আরো উন্নয়ন হবে সংরক্ষিত হলে আগামী প্রজন্মের জন্য সহায়ক হবে।

সভা :

পশ্চিম ত্রিপুরা জিলা পরিষদের সভাকক্ষে আজ জিলা পরিষদের দারিদ্র দূরীকরণ বিষয়ক স্থায়ী কমিটির সভা অনুষ্ঠিত হয়। কমিটির সভাপতি মনু রঞ্জন দাসের সভাপতিত্বে আয়োজিত এই সভায় উপস্থিত ছিলেন জিলা পরিষদের শিক্ষা ও স্বাস্থ্য বিষয়ক স্থায়ী কমিটির সভাপতি সঞ্জয় দাস, কমিটির সদস্যগণ এবং সংশ্লিষ্ট কমিটির সাথে যুক্ত বিভিন্ন দপ্তরের আধিকারিকরা। সভায় ডি ডব্লিউ এস দপ্তরের আধিকারিক জানান, ২০১৮-১৯ অর্থ বর্ষে পশ্চিম জেলায় ২৫টি ডিপ টিউবওয়েল সিংকিং, ২১টি ডিপ টিউবওয়েল কমিশনিং করার লক্ষ্যমাত্রা রয়েছে। পাইপ লাইন সম্প্রসারণের লক্ষ্যমাত্রা রয়েছে ১৩০ কিমি। ১৫০০টি বাড়িতে পাইপ লাইনের মাধ্যমে পানীয় জলের সংযোগ দেয়ার লক্ষ্যমাত্রা রয়েছে। মৎস্য দপ্তরের প্রতিনিধি জানান, পশ্চিম জেলার বিভিন্ন ব্লকের মৎস্য চাষী পরিবারকে কনিজাল দেয়া হয়েছে। দ্বিতীয় পর্যায়ে আরো ৮৫০টি কনিজাল দেয়া হবে। আগামী বর্ষা মরশুমে পশ্চিম জেলার বিভিন্ন ব্লকের মৎস্যজীবীদের মধ্যে ২৭ লক্ষ মাছের পোনা বিতরণের পরিকল্পনা নেয়া হয়েছে বলেও সভায় জানানো হয়।

আবহাওয়া :

আজ রাতে রাজ্যের সব জেলায় বিক্ষিপ্তভাবে ভারী বর্ষণের সতর্কতা জারি করেছে আবহাওয়া অফিস। আগামীকাল আকাশ সাধারণত: মেঘাচ্ছন্ন থাকবে। তাপমাত্রা সর্বোচ্চ ৩১ ডিগ্রী এবং সর্বনিম্ন ২০ ডিগ্রী সেলসিয়াসের কাছাকাছি থাকবে। আজ দিনের তাপমাত্রা ছিল সর্বোচ্চ ২৯.৭ ডিগ্রী এবং সর্বনিম্ন ২৩ ডিগ্রী সেলসিয়াস। আজ সকাল সাড়ে ৮টা থেকে বিকাল সাড়ে ৫টা পর্যন্ত বৃষ্টি হয়েছে ১.৪ মিলিমিটার।
